



Era quest onn procuran, sco l'onn passà Corin Curschellas cun ils Pflanzplätz, differents furmazions per divertiment musical. FOTO F. ANDRY

«Retro e tuttina cun diversas premieras»

24avels Dis da litteratura a Domat

■ (anr/fa) **Venderdi cumenzan puspè ils Dis da litteratura. Quest onn èn els vegnids organisads per l'emprima giada da Laura Decurtins, Sara Hermann, Sereina Nay e Natalia Tuor.** Sut il motto «retro-rumantsch» ha lieu dals 7 fin als 9 da november a Domat en la sala polivalenta Tircal ils 24avels Dis da litteratura. «Il tema 'retro' avain nus tscherni ensemen en il comité d'organisaziun causa che quai è in svilup frequent en la societad», di Sereina Nay, ina las commemoras dal comité d'organisaziun dals Dis da quest onn, «dapertut vegni discurrì da 'retro quest' e 'retro tschai', i va ferm en direcziun da nostalgia per ils temps passads.» Perquai han sias collegas Laura Decurtins, Sara Hermann e Natalia Tuor ed ella decis da tscherner quest tema per ils Dis da litteratura da quest onn: «Nus ans avain dumandadas, co interpreteschan ins quests temps che nun èn pli cun il pensar da quella giada? Cun noss program vulessan nus dar l'ocasiun dad interpretar da nov quai ch'è stà», declera Sereina Nay.

Emprim e-comic rumantsch

A chaschun dals Dis da litteratura vegnan preschentadas era quest onn novas publicaziuns ed i dat prelecziuns da cudeschs actuals. Venderdi saira envidan *Sabrina Bundi* e *Michel Decurtins* a la vernissascha da l'emprim comic digital rumantsch «Il Crestomat»: En il mund da la crestomazia cun dispita, guerra e caos tschenta da dr.

Clau e sa dumonda co ch'el saja arrivà en quests temps passads. Sonda vegn preschentada la nova Litteratura nr. 33. Al Tavulin litterar vegni discurrì da texts rumantschs che han fatg furora u perfin stgandel. En il studio litterar da la Televisiun Rumantscha discuta *Otmar Seiler* en sia emissiun directa cun plirs giasts davart il tema «retro» en la litteratura rumantscha. La saira mussan in trio da jazz, in autur ed in actur tge ch'i capita sche musica, litteratura e clowneria sa scuntran.

Nova furma era per il Premi Term Bel

Quest onn datti puspè la concorrenza da scriver Premi Term Bel. Sonda suentermezdi prelegian ils tschintg nominads lur texts. Quels vegnan alura analisads e dis-

cutads publicamain da la giuria. «Els vegnan giuditgads tant da la giuria sco era dal public», di Sereina Nay, «dentant senza tradir tgi che gudogna il premi da la giuria ed il premi dal public.» I saja da star cun mirveglias fin dumengia avantmezdi, di ella, «pir quella giada vegnì communitgà tgi ch'èn las victuras u victurs dals premis. Quai avain nus decis da far per mantegnair la tensiun fin dumengia.» Er il nov comité d'organisaziun ha mess pais sin il star da cumpagnia: Sonda saira èn tuts envidads a la tschaina cuminaivla «tradiziunala e tuttina à la nouvelle» e dumengia al ensolver «retro-brunch».

Il program cumplet dals 24avels Dis da litteratura ed ils tut nums dals participants chattan ins sin pagina www.litteraturarumantscha.ch

Cun in nov comité d'organisaziun

Ils Dis da litteratura 2014 han organisà quatter dunnas rumantschas che abitan e lavuran tuttas giu la Bassa: Laura Decurtins è creschida si a Cui-ra, sia mamma è Engiadinaisa e ses bab Sursilvan. Ella ha fatg il master en musicologia, istorgia e rumantsch e fa uss il doctorat en musicologia. Sara Hermann ha sias ragischs a Samedan. Da professiun è ella actura. Ella è l'unica dal comité d'organisa-

ziun che ha gia gidà ad organisar ils Dis da litteratura. Sereina Nay è oriunda da Trun ed abita uss ad Aarau. Da professiun magistra primara fa ella uss il studi da pedagogia curativa. Natalia Tuor deriva da Rabiuis ed abita a Turitg, er ella è magistra primara. «Organisar ils Dis da litteratura ans dat l'ocasiun da restar colliadas cun la lingua e la cultura rumantscha», di Sereina Nay.